

德壯果公年譜

德壯果公年譜卷四

次孫花沙納恭纂

乾隆六十年

十一月初十日

福康安和琳奏言

臣

等帶領官兵緊逼鴨保賊巢逆苗悉

力負固且有平隴等苗匪亦復糾衆前來助惡抗拒各隘

口砌築木城石卡賊匪攢集如蟻其鴨保之右卽係上下

天星大寨向係著名險要山路陡窄如我兵竟撲鴨保恐

各首逆由平隴一帶四散奔竄且慮天星寨之賊亦可繞

出龍角洞抄襲我兵後路

臣

等再三籌畫莫如分兵先行

攻撲天星寨山梁令鴨保寨堵禦之賊隄防稍懈卽乘勢
進奪石卡木城再爲合剿環攻之計隨於十四五等日分
兵由龍角洞之右直趨天星寨山坡對面連用大礮轟擊
該苗匪等自恃地險黨多抵死守拒自十六日以後天氣
驟寒雨雪交集山坡冰凌滑湍異常官兵頗艱跋涉各賊
卡內搭蓋窩棚躲避雨雪至二十一日天氣晴霽臣等卽
密派官兵分令額爾登保帶領綸布春阿哈保德勝長春
劉廷奇德甯馬瑀方和等爲一路德楞泰帶領塞靈額多
隆武富志那扎隆阿張永祺沙應龍等爲一路花連布等
帶領溫春西津泰定西鼎張玉龍姜敏功宋延清陳大定

等爲一路豁隆武那丹珠帶領巴蘭富蘭楊遇春吉林泰
五十一陳天雲等爲一路臣等親加督率於二十二日四
更由鴨保山直撲鴨保寨西南兩面挑選奮勇漢屯兵丁
及降苗人等多帶火彈鼓勇競上是夜朔風大作徧山樹
木震動兼之山溝路窄我兵俱從黑暗之中覓徑進發凡
遇刨挖濠溝處所均各攀援跳越而上先抵西面山梁木
城卽將火彈並力拋擲賊匪不虞官兵驟至正在持械抵
禦而所蓋窩棚已經燒燬頃刻之間各山坳賊卡火光齊
發槍聲絡繹維時風勢甚猛窩棚竹木等物著火俱飛各
卡苗匪惶駭無措官兵立時撲開木城七座石卡五處巴

圖魯侍衛將備等帶兵直衝賊隊槍箭所到斃賊極多乘勝復將垂藤董羅等處苗寨全行攻克餘匪俱向山溝小路紛紛竄逃_臣等分兵追趕賊匪心膽俱寒滾巖跌斃者積屍無數正在督兵前進而風力過大同雲密布四山雪片紛飛兼以重霧不辨路徑隨將官兵暫駐其天星寨賊苗因大兵連克垂藤各寨遠近木城石卡悉數焚燒情形震懾異常隨於次日冒雪詣營再三乞命_臣等當卽妥爲安撫該苗匪等均各叩頭感激而去

十二月十一日

福康安和琳奏言二十日卯刻_臣等督率額爾登保德楞

泰花連布及巴圖魯侍衛將備等挑選勁兵先撲小天星寨該處懸崖一線石角峻嶒我兵扳援而上山頂賊苗望見滾木擂石一時齊下相持竟日勢甚凶悍次日五更臣等復督率各將備兵丁由天星寨之後密尋間道奮勇向前排槍迎擊盤旋跳躍撲入賊卡賊苗一時措手不及旋用短兵相接刀矛並舉斃賊極多自辰至午卽將小天星寨攻克隨分兵圍剿中天星大天星各寨維時苗匪已知勢力不支紛紛奔竄我兵乘勝追剿當將大小賊寨縱火焚燒該苗匪等救死扶傷滾巖落澗者不計其數並查附近天星一帶山坳屯聚賊匪攢集如蟻當經整頓兵力復

從天星寨左右分兵繞道悉力進攻於二十三四等日又連克黃沖口巖窠山騎馬山上寨坡大地坡小峰山各處賊卡一十三處每處賊匪數百爲羣層層策應我兵晝夜接戰直抵得盤山梁殺賊無數餘衆均於爆木營蝦蟆地等處聚集希圖抵禦自鴨保以至平隴道路不下七八十里中間如地良坡萬溶江洞角等處山徑陡險爲進取平隴必由之路該苗匪等雖經連日勦散而夥黨衆多寨落紛錯勢必乘間復聚殊未便因屢勝之餘稍涉輕忽臣等現在惟有一面整頓兵力步步爲營攻取平隴痛勦吳八月賊黨一面駕馭降苗由廓家寨一路仍飭吳隴登搜尋

石三保蹤跡一得實在下落務卽併力前進設法擒捕

諭曰據福康安和琳奏賊匪在附近天星一帶山坳屯聚攢集經福康安和琳董率官兵將大小天星寨攻克復連克黃沖口賊卡十三處直抵得盤山梁可嘉之至務宜倍加奮勉迅奏成功現在年節已近所有例賞前已發往再賞給福康安和琳琿瑯三鍼洋表各一箇黃辦大荷包各一對小荷包各四箇並賞給額爾登保德楞泰琿瑯二鍼洋表各一箇黃辦大荷包各一箇小荷包各二箇花連布白玉搬指一箇黃辦大荷包一對小荷包二箇綸布春阿哈保塞靈額西津泰白玉搬指各一箇花大荷包各一對小荷包各二箇其滿漢屯土各兵再普賞一月錢

糧

二十二日

福康安和琳奏言本月初三日晚間齊集各兵次日黎明督率額爾登保德楞泰花連布那丹珠綸布春等分兵兩翼直撲爆木營山梁賊匪一見官兵兩路競上卽鳴鑼吶喊結隊而出分投迎拒我兵槍箭並發接戰三四時之久漸漸逼近山頂木城巴圖魯侍衛將備等帶領勁兵鼓勇躍入與賊匪攪殺一處殲斃甚多賊匪均向山後地良坡一帶踉蹌而遁維時天已傍晚適值雨雪紛霏官兵等頗艱跋涉但當賊匪甫經潰竄之次正應乘勝追趕痛加剿

殺隨經鼓勵將弁督率各兵不避風雪嚴寒連夜進發直抵地良坡該苗匪等勦散之餘驚喘未定正竄入苗寨欲圖休息不虞官兵追蹤驟至一時措手不及隨經官兵將所有苗寨四面攻圍拋擲火彈斃賊不可勝計而附近寨落尙有藏匿匪苗復於初五六等日分派勁旅冒雪進攻隨將八荆寨桃花寨等處逆苗寨落全行攻克我兵聯絡競進勇往倍常賊匪望風奔竄極爲震懼旋有乾州所屬之鬼猴溪一帶苗匪來營乞降臣等諭令大兵一到平隴卽挑選苗兵隨同勦賊該降苗等叩頭聽命

二十八日

福康安和琳奏言查地良坡一帶爲進取平隴必由之地

經_臣等督兵攻剿緣連日雨雪過大各官兵艱於登陟但

當該苗匪等震懼軍威之際不便稍有遲緩查地良坡對
面一帶山勢更爲重疊路徑叢雜其間橫峯側嶺層層均
有苗寨處處隄防初十日五更_臣等乘積雪未化之時卽

督同德楞泰興肇帶領綸布春溫春定西鼐德勝永安姜
敏功施縉岳中秀田中桂母之恭等爲一路派花連布觀
成阿哈保帶領多隆武長春劉廷奇張永祺楊遇春沙應
龍安如洞官啓文等爲一路那丹珠富志那塞靈額帶領
巴蘭西津泰張玉龍德甯馬瑜張騰霄游棟雲達自祥等

爲一路先搶對面高斗山梁另派額爾登保帶領常山富
蘭三音庫阿林布蒲益章岳廷極方和褚大榮李應貴等
挑選勁兵由爆木營山坡之下由山溝小路繞出賊後臣
等督率三路官兵扳援競上逆苗持械突出我兵槍箭齊
發連斃數十名俱踉蹌而竄官兵跟蹤追趕漸近山梁其
山後苗匪陸續麇至維時我兵已分占大小緊要山包奮
勇截殺適額爾登保繞至賊後出其不意痛加殲殺賊匪
抵敵不住官兵趁勢撲入苗寨縱火焚燒斃賊甚多將及
申酉之間復值風雪交加暫於山頂駐劄次日黎明據斗
思寨降苗隴老五等探報平隴各寨逆苗約有四五千人

定於十三日早晨齊集普定寨立旗祭神計議抗拒爲首
賊目係廖老慕隴老西等廖老慕係吳八月外甥等語
等一聞此信卽於十二日晚間分派官兵帶領降苗密爲
預備次日黎明直抵普定寨併力圍攻該苗匪等甫經聚
集一聞官兵冒雪驟至卽肆出抗拒我兵愈逼愈緊槍箭
所到斃賊極多並生擒賊匪四十餘名其廖老慕隴老西
二犯卽一併擒獲

諭曰現在盼望軍報喜音時深殷切本日據福康安和琳奏於積
雪未化之時督率將弁等分路進攻將高斗山梁搶占奮勇追
趕並卽趁勢撲入苗寨縱火焚燒斃賊甚多將爲首賊目廖老

慕龍老西二犯擒獲正法可嘉之至特賞福康安和琳大荷包
各一對小荷包各四箇內貯金銀鏤各二箇金銀錢各二枚額
爾登保德楞泰興肇觀成花連布大荷包各一對小荷包各四
箇內貯金銀錢各一枚金銀鏤各一箇五錢重銀鏤各二箇綸
布春阿哈保那丹珠富志那塞靈額大荷包各一對小荷包各
二箇銀鏤各二箇銀錢各二枚滿漢屯土各兵俱再賞一月錢
糧以示獎勵

十二月歲除日 誥贈公卒於京

嘉慶元年丙辰

公五十二歲在楚聞訃墨經從軍

正月初三日

福康安和琳奏言竊

臣

等查高斗山迤北擒頭坡一帶更

係懸崖陡險由擒頭坡前進則騾馬洞坡腳等處坡礪壁

立窄不容足向爲苗地最險處所平隴各苗匪正恃此爲

出入門戶據守甚力

臣

等察看形勢欲抵平隴必須從此

數十里要隘山梁出其不意奪險而入當令興肇觀成帶

領巴克坦布富魁順德三音庫豐紳吉勒通阿陳元燮李

之榮蒲益章張騰霄楊森王玉龍等於高斗山梁分擊營

卡虛張聲勢牽制賊苗

臣

等於十八日五更派令額爾登

保帶領綸布春塞靈額西津泰溫春多隆武吉蘭泰等作

爲一路德楞泰帶領阿哈保定西爾巴蘭富僧德明阿施
綰張永祺等作爲一路花連布豁隆武帶領三布爾富蘭
和忻布長春劉廷奇楊遇春等作爲一路那丹珠富志那
帶領色克通阿常山格布慎清志德甯馬瑞沙應龍等作
爲一路臣等督率各路將士併力進攻行抵距擒頭坡十
餘里地方山路愈窄石城木卡愈多我兵攀援陡礮分隊
魚貫盤旋競上賊苗自恃夥黨衆多蜂擁齊出山坳石角
之間苗匪槍礮絡繹臣等督率將領等分投帶兵爭先迎
擊賊匪往來衝突短兵相接並不稍退接戰數時額爾登
保復帶同綸布春塞靈額西津泰等奮勇直前各隊將弁

兵丁亦踴躍並進殲賊甚多當將擒頭坡一帶木城石卡
全行奪據旋即整頓兵力連夜進攻並查騾馬洞山勢較
擒頭坡陡險更甚賊匪早經占距必須迅速設法攻剿又
派額爾登保選帶巴圖魯侍衛將備等由坡腳山梁分兵
前往遏其歸路臣等督率大兵隨剿隨進復將聚集賊匪
悉力環攻直抵騾馬洞大山自辰至午斃賊六七百名餘
衆正思奪路奔竄適額爾登保等帶兵由坡腳山一路追
剿迎合加攻逼至懸崖陡礮賊匪逃遁無門著槍帶箭及
奔竄不及紛紛滾跌者不計其數梟獲首級二百餘顆立
將騾馬洞坡腳山及附近之兩岔河川洞等處各大山梁

全行奪據共燒燬苗寨三百餘戶奪獲賊匪大礮二箇及
槍刀器械糧食衣物等件無算此次官兵仰仗

天威爭先奮勇兩日之內攻克險隘大山梁縣互三十餘里殲戮
賊苗甚多人心無不稱快

諭曰現值元正連日盼望軍營捷音正深懸企本日福康安和琳
奏攻克擒頭坡騾馬洞等處險要賊寨痛殲苗匪覽奏欣悅擒
頭坡山路險窄賊匪木城石卡愈多福康安和琳密爲布置出
其不意奪隘而入並令額爾登保分兵前往遏其歸路大加殲
戮卽將騾馬洞各大山梁全行奪據擒頭坡騾馬洞爲平隴乾
州門戶門戶旣破官兵乘勢長驅直抵平隴現值年節福康安

和琳遠在軍營懋著勞績嘉獎之餘深爲眷念親解佩帶小荷包四箇黃色珊瑚豆者賞給福康安和琳內貯金銀錢各二箇紅色綠豆者賞給額爾登保德楞泰內貯金銀錢各一箇並賞給興肇觀成花連布豁隆武那丹珠富志那綸布春塞靈額阿哈保小荷包各一箇內貯銀錢各一箇適有回子廓爾喀呈進細緞布疋等項分賞內廷王公大臣侍衛及蒙古王公等因福康安和琳額爾登保德楞泰等俱在軍營出力一體頒賞

又

諭曰賊匪勢窮力蹙尙敢負隅抗拒經福康安和琳分兵突進攻撲焚燒並將賊目隴老三生擒正法所辦俱好著賞福康安和

琳乾果二匣鹿尾十箇又發去玉搬指十四箇內舊暈喜字玉搬指一對白玉喜字搬指五箇福康安和琳於此內自行揀擇二箇餘給額爾登保德楞泰花連布各一箇其餘於帶兵之巴圖魯侍衛鎮將內擇其尤爲出力者每人賞給一箇所有滿漢屯土兵丁及打仗出力之新降苗再賞給一月錢糧其邀集衆苗生擒賊目之降苗隴三棵隴老柔二人深堪嘉獎賞給六品頂戴其餘亦厚加賞賚

二十日

福康安和琳奏言臣等於初二日辰刻行抵吉吉寨地方該處兩山夾河苗匪甚衆當經督率額爾登保德楞泰興

肇觀成花連布那丹珠富志那及巴圖魯侍衛將備等分
兵兩翼抄上左右山梁乘勢下壓該苗匪等亦搶上山坡
分投迎拒我兵兩面夾攻奮勇勦殺斃賊極多滾跌溪溝
者更不可勝計遂將吉吉寨兩面山梁奪據

二月初五日

福康安和琳奏言臣等於正月十四日督率額爾登保德
楞泰花連布及巴圖魯侍衛鎮將等由吉吉寨山梁整兵
前進查該處有夾溝一道兩面均係懸崖山溝之內因雨
雪累月俱係積水淤泥甚艱跋涉兩旁山礮之下均有逆
苗寨落臣等鼓勵將士併力進攻十五日黎明行抵溝口

先用大礮向前轟打抵住賊匪官兵卽跳躍而下各寨苗匪一時猝不及防悉被官兵乘勢撲入縱火焚燒槍礮所到殲戮無數我兵奮勇疾馳直撲上連雲山甫經拏營該苗匪等復於是晚捨命攻撲我兵排槍抵敵相持徹夜次早賊苗始退臣等又卽分兵進剿當將巖洞大寨三十餘戶賊匪全行攻克

諭曰福康安和琳奏官兵攻克連雲山巖洞寨等處打仗得勝此次福康安和琳及將弁兵丁等實在勞苦著賞給福康安嵌珊瑚帶頭一箇黃綠珊瑚豆大荷包一對小荷包四箇和琳洋瑤瑯帶頭一箇黃綠珊瑚豆大荷包一對小荷包四箇額爾登保

德楞泰黃辦大荷包各一對小荷包各四箇火鑷各一箇穆克登阿花連布黃辦大荷包各一對小荷包各四箇火鑷各一箇珠隆阿達音泰常明綸布春永安安如洞大荷包各一對小荷包各二箇

十六日

福康安和琳奏言正月二十七八等日賊苗由連雲山附近之猴子山蛇退嶺等處攢集而至遠近山包分布幾滿當經_臣等督率額爾登保德楞泰花連布那丹珠塞靈額阿哈保定西爾溫春西津泰常山德勝等帶領勁兵分投迎擊賊匪往來衝突被官兵痛加殲殺帶槍著箭者山坳

石角之間僵仆徧地幾及兩晝夜直至二十九日晚間適
值風雨驟至始從霧雨迷漫之中乘間竄去臣等正在整
兵前進復據報地良坡桃花寨等處又有賊匪糾結計圖
繞截後路當留花連布等將連雲山一帶營卡督兵嚴防
臣等復督率額爾登保德楞泰興肇觀成巴圖魯侍衛將
備等連夜疾馳及繞道迎擊於初一日黎明將抵騎馬山
遙見對面山梁屯聚賊匪不下五六千人一見官兵驟到
卽使放排槍悉力對拒臣等分兵兩翼斃賊百餘賊勢稍
卻旋有紅衣賊目數人搖旗指揮復帶苗衆搶上山坡勢
甚凶悍自辰至午撲壓五六次巴圖魯侍衛將備等短兵

相接刀矛並舉殲斃賊苗不可勝計隨乘勢直前連將騎
馬山火里坪一帶苗寨縱火焚燒將至傍晚餘衆始行紛
潰_臣等現將前後左右各路營卡再加嚴密布置以圖進
取

十九日

諭曰今賞王公大臣等四團龍褂蟒袍等件更念軍前大臣等平
賊勞苦特頒賞福康安緙絲四團龍褂一件和琳緙絲蟒袍一
件以示優眷其帶兵出力之額爾登保德楞泰觀成興肇穆克
登阿花連布達音泰那丹珠田永桐劉惠蘇靈袁敏富志那諸
神保豁隆武綸布春阿哈保塞靈額蟒袍各一件俾益加鼓勵

迅勉成功

二十九日

福康安和琳奏言自初四五以至十一二等日臣等節次發兵分投攻擊該苗匪等悉於緊要山梁隘口集衆相持排放槍礮抵禦甚力稍退復來我兵跟蹤追剿賊匪復由旁徑肆出凶悍情形實深痛恨十三日黎明臣等督率額爾登保德楞泰花連布及巴圖魯侍衛將備挑選勁兵由連雲山前進繞過數道山梁沿坡上下苗寨均有賊匪屯聚我兵隨剿隨進殲戮無算直抵壁多大山該處峯巒峻削路徑更險下臨寬溝一道臣等督兵一上山梁卽分占

山包趕緊拏卡賊匪乘勢捨命圍裹而來衝突十數次我兵槍礮競發賊匪不敢逼近將及申酉之間漸次退去查看賊匪伏匿不遠隨卽分兵下壓痛加殲戮我兵連夜競進黑暗之中帶槍著箭及滾跌山溝者不計其數並拏獲活賊五十七名

三月初十日

福康安和琳奏言查龍角洞鴨保山一路直至大營地處萬山層疊之中晴霽日少自交春令更無日不雨霧迷漫山坡上下泥湍官兵旣艱跋涉該苗匪等據險相持亦無由肆其豕突十九及二十一二等日霧雨稍止卽督兵前

進於鵲兒嶺等處甫與賊匪接仗槍礮並發賊苗正當被
勦緊急死傷徧地乃未及數刻霧氣聚合密雨如注暫行
收兵而永綏葫蘆坪龍角洞水田壩木樹汛等處亦有逆
苗於早晚乘間攻撲二十四日晚間據報逆苗聚衆正在
壁多山對面高吉陀地方意在窺伺大營臣等卽督率額
爾登保德楞泰興肇花連布綸布春及巴圖魯侍衛將備
等挑選勁兵鼓勇進發直撲高吉陀該處徧山石角峻峭
賊苗攢伏如蟻我兵扳援跳躍而上該苗匪等肆出放槍
捨命衝突維時各隊官兵或奪占山梁或直衝賊隊殲戮
賊苗不可勝計其餘較遠各山梁尙有救應賊匪無數臣

等卽用大礮併力轟擊遙見賊人漸次潰亂所有高吉陀與官兵抗拒之賊自知力不能支亦卽徧山爬越覓路奔竄我兵乘勝前進直抵巴金灣將該處逆苗寨落全行燒燬

二十五日

福康安和琳奏言初四日晚間據降苗稟報採訪廖家冲桿子坪久蘇坪瀑水新寨灣等處苗匪集衆數千因聞大兵采入欲從爆木營一帶抄襲後路等語臣等當卽飛派額爾登保德楞泰帶領巴圖魯侍衛將備等挑選勁兵連夜迎擊初五日黎明甫過爆木營山梁卽有賊苗三四千

人蜂擁而至我兵鼓勇直前槍箭並發該苗匪等捨命相持自辰至酉始行潰散殲戮賊匪無數額爾登保等隨將官兵撤回次日辰刻復據稱擒頭坡一路亦有賊苗集衆攻撲營卡臣等卽帶領額爾登保德楞泰花連布那丹珠等督率將備兵丁分頭夾擊查該處賊匪攢集不下五六千人正在攻撲我兵防駐營卡臣等一到卽令額爾登保德楞泰花連布等分兵三隊直撲賊羣賊匪因見官兵聲勢浩大旋即退入擒頭坡後面山梁臣等連用大礮併力轟擊相持一晝夜槍礮所到擊殺賊苗不可勝計臣等一面將該處營卡添派官兵嚴飭各將備等認真防守一面

跟探賊蹤乘勢搜剿於初九日進抵禾粟山該處亦係通往平隴小路賊苗於山頂築卡抵禦官兵甫欲進攻旋有賊苗結隊而來我兵占住山頂分投下壓賊苗衝突十餘次連被官兵悉力迎擊著槍帶箭及滾跌山溝者不計其數將及申酉之間均由龍草溪一帶踉蹌潰竄

四月十一日

福祿安和琳奏言二十三日四鼓雨霧開霽督令各路官兵直取山梁賊卡賊匪聞官兵驟至捨命迎敵我兵拔援競上或直撲賊羣或繞出賊後官兵人人奮勇每路所殺賊匪自一二百至二三百名不等當將納共山緊要山梁

先行奪據趁勢連克貴道嶺七星坡苗家陀層石岡各處
木城石卡四十餘座所有山下苗寨三百餘戶一概焚燒
乃勦散各賊甫經潰竄而附近各寨陸續接應者又復結
隊前來遠近山包攢集無數臣等一面趕緊拏立營卡一
面連夜派撥各兵督同額爾登保德楞泰等乘勝攻勦不
遺餘力約進二三十里直抵長吉山梁查該處有石城一
道高約丈餘縣互數里密排鹿角外創深濠賊匪高據山
嶺極爲得勢臣等嚴催各路官兵扳援陡礮先將石城左
近大小山包零星木卡石卡次第奪據不下三十餘處漸
漸逼近石城竟用槍礮併力轟擊賊匪因見官兵層層密

圍石城四面陸續轟塌勢已危急卽分投躍出與官兵抵死衝突臣等與額爾登保德楞泰帶領巴圖魯侍衛將備等督率勁兵直搶山梁鼓勇競上斃賊不可勝計復將茶山茨巖有名大山全行占據所有賊寨俱放火焚燒各路官兵分頭追剿復又搶占捷定坪筆架山勒兆坡瀑水源等處山梁十餘處共計連日拏獲活賊三十七名審明之後均卽於陣前正法與割獲首級一併徧山梟示所有攻克大山皆係平隴一帶緊要屏障現經官兵乘勢分駐兵威壯盛倍常

諭曰福康安和琳統率將弁兵丁等乘雨霧初霽之時分路前進

奮勇超登每路殲賊甚多由納共山直抵長吉山梁將茶山茨
巖各有名大山全行占據實在出力可嘉著賞給福康安和琳
金鑲松石盒各一箇黃辦珊瑚豆大荷包各一對小荷包各四
箇額爾登保德楞泰珊瑚豆火鑱袋各一箇黃辦大荷包各一
對小荷包各四箇興肇花連布珠隆阿綸布春阿哈保達音泰
朱射斗那丹珠大荷包各一對小荷包各一箇以示鼓勵其打
仗出力之旗營屯土各兵著賞給一月錢糧俾知鼓勵

二十四日

福康安和琳奏言查長吉山對面有結石岡大山梁一道
賊苗攢集尤衆疊石爲城極爲堅固臣等連日已將旁路

賊卡次第勦除卽於初八日辰刻督率額爾登保德楞泰等及巴圖魯侍衛將備帶領勁兵直搶結石岡山梁凡有沿途挖斷道路俱令官兵預備口袋盛土填塞盤旋競進賊匪望見官兵乍到卽排槍抵拒我兵分開兩路圍撲石城並於石城之左先占住山包一處趕緊拏卡併力相持賊苗見官兵逼近槍礮甚猛尙復抵死迎敵臣等嚴督各兵悉力攻擊直至傍晚賊匪力不能支始行慌亂官兵乘勢奮勇搶入石城痛加殲殺該苗匪等捨命奔馳竄回甘露嶺石卡復經官兵趕上箭槍齊發斃賊不可勝計臣等逐加搜捕又將牧牛坪竹石坪等處大小寨落七十餘戶

全行燒燬

五月初一日

諭曰昨據福康安和琳奏官兵連日攻獲結石岡等處賊卡二十餘座殲賊甚多並將牧牛坪竹石坪等處大小寨落全數焚燒奪占甚爲奮勇可嘉已降旨交部議敘現在該處距平隴賊巢不遠所有緊要屏障俱經官兵乘勝占取且首逆吳隴登業已到營乞命此時福康安和琳正當直搗平隴收復乾州捷音諒已在途朕心深爲盼望現屆天中佳節福康安和琳著與在京軍機大臣一例賞給扇套香袋扇錠等物額爾登保德楞泰除與御前侍衛一例賞給葛紗曹扇香串香袋外額爾登保德楞

泰興肇觀成劉君輔仍各賞給扇套一箇香袋四箇小荷包二箇孫士毅勒保福甯馮光熊姜晟俱照內廷尙書侍郎之例各賞給香袋六箇小荷包一箇扇套一箇以示朕眷念勤勞至意

初六日

福康安和琳奏言連日粵東官兵分起趕到已有二千餘名因卽趕緊派撥滿漢屯土官兵分投進剿乃該苗匪等因結石岡一帶石城石卡次第盡失又復到處糾約夥黨分布要路創濠砌卡以爲苟延殘喘之計臣等於十四日與額爾登保德楞泰督率各兵分隊競進直抵官道溪山梁該處賊苗自恃地勢險峻卡隘堅固悉力抵禦相持兩

晝夜因官兵愈勦愈力自知勢不能支始行潰散我兵乘勢直前當將官道溪上下苗寨放火焚燒共計百十餘戶斃賊極多臣等一面占住山梁分兵拏卡一面探訪路徑查問前火麻營一帶山勢更爲重疊中間緊要地方有大石卡四處山腰橫築石城一道高有七八尺徧豎賊旗賊衆蟻伏以待臣等於十八日晚間分兵三路派令綸布春西津泰等帶兵一路由管塙坡進攻吉蘭泰墨爾歡保等帶兵一路由吉土坡進攻珠隆阿達音泰等帶兵一路由羊驪山進攻並派朱射斗多隆武帶兵於新塞灣麻沖等處堵截旁路牽綴賊匪以防抄襲臣等同額爾登保德楞

泰帶領巴圖魯侍衛將備等往來督催十九日黎明三路官兵齊撲火麻營山梁所有石城內賊匪排列槍礮捨命抗拒我兵扳援仰攻極爲費力臣等當卽留兵一路與賊匪悉力相持作爲欲進之勢另挑派奮勇勁兵分開兩翼繞出賊後山巔之上併力下壓賊匪三面受敵不能抵禦立形慌亂當將山腰石城一道乘勝撲開賊匪拋擲器械捨命逃竄我兵分投追剿賊衆滾巖跌斃者不可勝計各卡內賊匪望見爭先躍出互相救援悉經官兵衝截痛加殲殺隨將火麻營一帶大山全行攻克次日辰刻復將附近之息戟山望城坡得羅山豹盤山野牛坡等處山梁趕

緊奪占賊匪無不望風奔潰凡有山坳大小苗寨適製得
火箭數百枝遠近齊發燒燬甚衆共計官兵連日進剿又
深入二十餘里察看苗匪情形雖復節節抗禦然屢經痛
加剿戮實已震懾倍常

諭曰福康安和琳攻克火麻營一帶險要山梁距平隴更近此時
賊匪緊要屏障俱經官兵乘勝占奪而石三保石柳鄧吳廷禮
等首惡俱聚集平隴正可悉數生擒一舉蕲功事機順利佇待
捷音速至此次福康安和琳連得卡隘痛殲賊衆調度有方殊
屬可嘉著賞給金嵌松石盒各一箇又珊瑚豆大荷包各一對
小荷包各四箇用昭優眷其分路領兵打仗出力之額爾登保

德楞泰綸布春珠隆阿達音泰朱射斗俱著賞給大小荷包以示獎勵

二十日

福康安和琳奏言二十日以後大雨淋漓霧氣四合懸崖仄徑泥深尺餘山溝水勢驟長層層阻隔直至二十八日雨勢稍止卽分派將備將火麻營兩旁緊要隘口帶兵堵截_臣等督同額爾登保德楞泰綸布春阿哈保花連布達音泰及巴圖魯侍衛等分隊進攻連克灣溪嶺紫泥山油麻灣茶坳等處賊卡八九座隨剿隨進直抵廖家冲山梁該處峰巒陡削路徑叢雜異常_臣等督兵一到遙望山巔

橫有石卡一道約計屯聚賊匪不過數百人當經力催各兵奮勇競上槍箭並發直撲山梁立將賊卡奪據賊苗紛紛潰散維時天色漸晚且積雨之後山路泥淪卽令各官兵暫行駐劄次日黎明臣等正在分兵進發適苗匪等糾集多人三面驟至蜂屯蟻聚捨死直撲我兵分投迎擊撲壓十餘次斃賊甚多察看賊匪往來竄伏要路上有山包一處名爲連峰坳必須將該處奪獲方足以遏賊勢隨卽挑選奮勇滿漢屯土各兵於初四日四鼓繞道密發並將各兵一半放槍拒賊一半用布袋盛土背負而上準備擊卡一抵連峯坳賊匪亦經預備對面放槍絡繹如雨額爾

登保德楞泰等鼓勇向前嚴督將備兵丁卽於槍礮之中
趕緊拏卡占住山梁將賊匪要路截斷賊見我兵已據勝
勢自知力不能支旋卽惶駭四散巴圖魯侍衛將備等登
山越嶺分投冒雨追擊殲斃極多凡有潛伏溝內之賊逃
走不及者大半帶槍著箭滾跌而斃共計由廖家沖而進
又連占山梁七座

是月大學士貝子福康安卒於軍

六月十四日

和琳奏言二十七日積霧開散可辨路徑見賊苗百十爲
羣在於遠近山梁屯劄瞭望臣隨卽躡探得路督同額爾

登保德楞泰等分撥各兵進攻得峰山一帶地方查該處
係長嶺一道兩旁陡礮之下苗匪上下往來不絕如蟻必
須攻守並用方能有濟當將官兵分爲三隊令額爾登保
阿哈保達音泰帶領西津泰三音庫烏爾呼納等爲頭起
德楞泰帶領格布慎和忻布薩克丹布等爲二起臣帶領
興肇托爾歡豐紳阿納保噶拉吉蘭泰汪熊姜敏功張倬
等爲三起魚貫競進二十八日黎明頭起官兵一上山坡
左右潛匿苗匪卽捨命躍出欲圖衝截維時額爾登保等
已經帶兵搶上山梁排槍轟擊撲壓十餘次賊匪愈聚愈
多臣隨督同德楞泰等先後趕緊接應分投痛加剿殺賊

匪見官兵勢大不敢直前拒敵俱退伏於巖礪之下放槍
抵禦而對面全壁嶺一帶亦有賊苗糾聚前來與我兵三
面抗拒維時已經傍晚臣復督同額爾登保德楞泰巴圖
魯侍衛鎮將等連夜於得峰山一面接聯擊卡七十餘處
分拒兩旁賊苗一面卽帶兵直撲全壁嶺賊卡賊苗蜂擁
放槍肆出拒敵我兵人人奮勇併力爭先撲開賊卡一處
卽占住一處槍箭所到殲斃甚多其左右山溝內潛伏賊
匪乘勢拔援徑上分投救應臣又飛派花連布等帶領將
弁等鼓勇截殺使賊不得撲上其時後隊官兵見賊勢慌
亂乘勢壓下搶至兩旁山溝苗寨放火賊匪始俱紛紛潰

竄各路官兵往來追剿斃賊不可勝計

諭曰和琳此次分兵三路親至督率打仗連得險要山梁甚爲可嘉惟軍營水土惡劣氣候鬱蒸不免疫癘特賞給和琳洋盒一箇內貯御用白玉佛頭伽楠手串一掛上拴漢玉玩五件又小荷包二箇內貯九合香最能解除邪穢此外小荷包三箇亦俱貯九合香著賞額爾登保德楞泰花連布各一箇現當溽暑之際和琳總須速行籌辦及早撤兵惟願此次所賞九合香到時業經撤兵奏捷無須藉此祛除瘴癘實所深望耳

二十三日

和琳奏言

臣

於初二日督同額爾登保德楞泰及巴圖魯

侍衛鎮將等挑選勁兵先搶廖貢坡遠見山嶺賊匪攢集如蟻我兵甫至山坳卽有穿紅衣塗面執旗賊目十餘人帶領匪徒千餘跳躍而下排槍抵敵當經額爾登保德楞泰等督兵迎擊攪殺良久殲斃賊匪無算尙不遽退臣復派令阿哈保達音泰等分兵兩翼潛從左右山坡扳援陡壁盤旋而上賊匪見我兵三路合攻抵禦不及旋即棄卡奔竄當將廖貢坡山梁奪據由廖貢坡前進山勢更形散漫兩旁橫峯側嶺處處均有苗匪築卡死守若不悉行奪據誠恐被賊抄襲隨卽趕緊分兵布置聲東擊西自初三以至初六等日節次奪據水牛坡木里坪灰山萬板坡等

處層層圍裹隨剿隨進賊匪退聚馬鞍山之上該處更爲
乾州緊要門戶其下卽臨大河守禦更力臣乘將士銳氣
於初七日晚間令額爾登保德楞泰達音泰等各帶巴圖
魯侍衛將備官兵於次日五鼓分投進發並密行選派奮
勇出力之屯土降苗備弁兵丁等先於三更時潛伏賊卡
左近預先埋伏臣督率滿漢官兵隨後策應繼進天未黎明
額爾登保等大隊甫抵山腳賊匪羣出放槍相拒侍衛
將備等身冒矢石正在相持之際經前埋伏之兵從草坡
石礮內一齊吶喊跳躍競上短兵相接賊匪等猝不及防
慌亂無措額爾登保德楞泰指揮各路乘勢圍攏撲開賊

卡斃賊無數餘衆踉蹌逃遁官兵沿坡追剿直至河邊槍斃執旗賊目四人割獲首級一百五十餘顆餘賊均捨命赴水過河著傷淹斃者更不可勝計

諭日和琳奏官兵攻抵馬鞍山卽行設法渡河進剿覽奏欣慰此次和琳調度布置悉合機宜可嘉之至現當溽暑之時正深廛念今和琳統領官兵等乘勝進剿人人奮勇殲賊甚多此皆仰荷

天佑事機順利欣慰之餘倍深欽感特解親佩有穗蒙古荷包一箇交和珅寄賞和琳以示嘉獎仍加賞漢玉搬指一箇金嵌松石火鐮包一箇珊瑚豆大荷包一對小荷包四箇額爾登保德

楞泰各賞翡翠玉搬指一箇繡火鐮包一箇大荷包一對小荷包四箇阿哈保奮勇受傷著賞白玉搬指一箇繡火鐮包一箇大荷包一對小荷包四箇綸布春西津泰達音泰各賞大荷包一對小荷包四箇用昭優眷

七月初一日

和琳奏言

臣

查捧風坳一帶山梁爲通平隴僻徑灣溪一

帶爲桿子坪泡水等處賊匪來路均須防備隨派令巴蘭多隆武等帶兵搶據捧風坳以堵平隴賊匪衝突令花連布托爾歡墨爾歡保汪啟紀等帶兵搶據灣溪以防桿子坪泡水賊匪抄截

臣

督率額爾登保德楞泰等設法渡河

賊匪均於隔河可渡之處創挖深濠潛伏其內排列槍礮
與我兵相持至十二十三等日河水稍落露出灘淺處所
隨於十四日晚間派令達音泰西津泰三音庫阿達富蘭
長春等帶兵爲左一路溫春富僧德格布慎劉廷奇朱大
定陳紹先等帶兵爲右一路臣督同額爾登保德楞泰三
布鼐豐紳噶拉諾木齊和忻布噶達鼐薩秉阿等爲中一
路先令左右兩路於四更時直撲河岸賊匪望見官兵驟
至糾衆抵禦臣督同額爾登保德楞泰等乘苗匪於上下
游兩路官兵抵禦之際卽趕緊向前亂流竟渡額爾登保
帶領巴圖魯屯土官兵等首先登岸槍箭並發賊匪措手

不及退上尖雲山梁維時左右兩路官兵亦乘勢過河三路官兵奮勇齊撲尖雲山梁賊卡賊匪槍子如雨我兵人思奮魚貫而上撲開賊卡十餘處殲斃不可勝計隨將尖雲山奪占維時遠近逆苗聞風竄至凡乾州附近周圍山梁分布幾滿臣同額爾登保德楞泰督率巴圖魯侍衛將備滿漢屯土官兵等復連夜分投派撥援登陟悉力進攻賊苗依山傍箐修築木城石卡官兵所到賊匪無不捨命相持幸仰仗

天威將士益加奮勇自十五以至十六日晝夜接戰連克黃連坡曬谷坡窩灰坡田頭沖二礮臺等處木城石卡不下六七

十處所有長灘村兩頭田平者野豬洞一帶本係民村均被苗匪焚搶糾夥盤踞我兵乘勝即將賊匪所搭窩棚逐加搜捕縱火焚燒苗匪紛紛潰竄我兵四面圍攏殲斃不下六七百人直抵二礮臺距城不過二三里賊匪見官兵勢大恐被圍困不敢入城旋即四散奔逸官兵卽於二礮臺暫行駐劄當將周圍緊要山梁一律安營紮卡

諭曰和琳自督率剿捕苗匪以來運籌布置悉中窺要此次督兵進剿身先士卒乘勝直前尤爲懋著勞績著加恩賞戴三眼花翎用昭優眷額爾登保屢次打仗奮勉曾加恩補授內大臣都統此次於渡河後帶領兵丁首先登岸實爲奮勇可嘉亦著加

恩賞戴雙眼花翎保甯現任伊犁將軍所有領侍衛內大臣一缺卽著額爾登保署理以示優獎和琳額爾登保德楞泰仍著交部從優議敘

初八日

和琳奏言查乾州一帶附近多係民田週圍苗寨環列地方甚廣所有各路節次剿散逆苗無不以此爲遁逃之藪惟有先將此種散苗悉力搜除不致受其牽掣方能爲分投剿洗之計隨於十八九等日督同額爾登保德楞泰興肇花連布達音泰西津泰及巴圖魯侍衛將備等帶領滿漢屯土官兵分路進剿如灣溪一帶長灘村兩頭田等處

所有賊匪搭蓋窩棚雖經燒燬而附近之邑柳麥李坪平至樂坪平者等處餘衆依林傍箐百十爲羣仍復晝夜窺伺不時滋擾幸連日以來次第搜捕殲斃於槍礮之下者不可勝計

二十六日

和琳奏言臣於初六七等日整頓兵力督同額爾登保德楞泰興肇花連布達音泰及巴圖魯侍衛將備等沿途搜捕而進中間節節均有逆苗屯聚並查大莊小莊一帶均係民村久爲苗匪占踞耕種茲當收成之際均恐搶割田禾防禦甚力臣與額爾登保德楞泰等督率官兵自初七

以至初十等日連次將雅溪大坡壟黃茅田狗兒寨黎樹
七方橋三世豬湯家寨吳家寨施金坪雙塘夯陀大壩坪
等處民村苗寨逐加搜捕凡有抗拒逆苗無不大加殲戮
十一日攻抵大莊袁敏帶兵雖已進至老巖屋而山路環
曲相距尙遙臣卽連夜立遣德楞泰帶領巴圖魯將備等
奮勇向前勦散賊匪直抵袁敏劄營地方隨後分派官兵
拏卡接應所有兩旁曾經投降各寨因爲逆苗阻隔者一
聞官兵會合卽絡繹前來均經臣分別駕馭俾令各回本
寨該苗民等叩頭感激而乾州紳士人等逃避河溪一帶
者亦扶老攜幼而來歡聲載道均欲卽赴乾州各尋基業

八月初五日

和琳奏言

臣

於十八日晚間督同額爾登保德楞泰阿哈

保西津泰達音泰等帶領官兵由三岔坪一路潛進並令
該百戶吳廷試吳廷棟吳老計吳定義等帶領苗兵在前
進發適平隴賊苗聞知三岔坪苗衆業已投降糾聚苗匪
乘夜依山順溝前來欲燒三岔坪寨落不虞官兵正從三
岔坪進剿在前降苗一與逆苗猝遇喊聲齊發賊苗自恃
人衆捨命相持攪殺一處勢甚兇悍

臣

遂與額爾登保德

楞泰等督飭官兵四面圍攏槍礮並發賊苗正與降苗抵
敵之際驟經官兵堵殺無不惶駭失措四散奔逃我兵分

投追趕斃賊不可勝計生擒活賊六名內吳老二一名係
吳八月胞姪並割獲首級四顆臣查三岔坪苗眾既能如
此奮勇殺賊是其真心降順尙屬可嘉當將出力各苗重
加獎賞准其降順現在平隴賊匪聚集既多且首逆石柳
鄧亦在彼竄匿與吳廷義等狼狽爲奸正應乘此兵威勝
勢直搗賊巢一鼓集事復於二十日督同額爾登保德楞
泰等分率官兵及原派該處堵截之侍衛將備於三更時
直撲捧風坳山前賊卡我兵一到賊苗卽於卡內排列放
槍抵死守禦我兵扳援仰攻不遺餘力將及黎明我兵奮
勇向前撲開賊卡殲斃無數隨將捧風坳山前賊卡全行

奪據拏獲賊目吳老散一名活賊九名一併凌遲梟示

十二日

和琳奏言

臣

於二十七日先令西津泰阿哈保等兩路並

發察探賊匪果於白蠟坡黃連坡分投迎抗隨令額爾登
保德楞泰等帶兵由捧風坳正路分兵競進

臣

同豐紳殷

德帶領巴圖魯侍衛將備及豐紳宜縣等往來督催策應
捧風坳山前竹山坡一帶有石卡一道爲平隴隘口賊
匪屯聚甚多我兵陸續魚貫而上將至山坡賊匪衝突下
拒騎馬執旗賊目不下二十餘人在前指揮極爲兇悍我
兵人人思奮槍箭所到連斃賊目五六名其餘殲斃不可

勝計自辰至午賊衆紛紛向山後撤退勢漸潰亂我兵乘勝搶上山梁遂將竹山坡賊卡奪據而左手之都魯溪地方亦有大山一道勢極險峻復於次日四更令額爾登保德楞泰帶領巴圖魯侍衛將備等攻撲山梁該苗匪等因連日各路攻圍緊急被官兵擊敗之後喘息未定昏黑之中一聞槍聲驟發立形慌亂我兵兩路夾攻殺賊無算並拏獲活賊九名內有漢奸田應喬一名曾受吳廷禮偽封職官訊明之後卽於軍前寸磔梟示現在大兵節次奪險采入漸近平隴賊巢

二十三日

和琳奏言查強虎哨相距數里有溪河一道賊苗沿坡築卡守禦甚堅

臣

自攻克竹山坡賊卡之後先將該處緊要

隘口嚴兵堵截以杜賊苗潰竄隨於初五日晚間派令西

津泰富僧德格布慎長春陳天雲等帶兵先由礮樓坡前

進搶至河邊誘賊迎敵

臣

於初六日五更督同額爾登保

德楞泰阿哈保達音泰等帶領巴圖魯侍衛將備由龍圖

營分起進攻所有沿河抗拒苗匪見礮樓坡地方官兵驟

至正在糾衆迎敵不意龍圖營大兵又至直逼河岸槍礮

並發賊匪兩路受敵均各棄卡奔潰官兵乘勝渡河隨剿

隨進斃賊不可勝計當將強虎哨左右兩面山梁分兵搶

據惟時平隴一帶遠近各寨因大兵攻勦緊急離巢穴不遠復糾聚苗衆依山順溝攢集而至乘官兵營卡未定之時捨命攻撲臣飭各將備等一面嚴兵以待止令輪流迎敵毋許追擊以疲其力而賊苗晝夜上撲悉被官兵槍箭擊殺察看賊勢漸怯臣卽於初九日五更督同額爾登保德楞泰阿哈保西津泰達音泰及巴圖魯侍衛將備等分兵兩翼出其不意直攻強虎哨山梁該處山坡層疊草深樹密之間節節俱砌有石卡卡內窩棚櫛比官兵密從懸崖陡礮盤旋而上一近石卡卽拋擲火彈拉雜焚燒賊苗肆出抵拒經官兵截住短兵相接斃賊三百餘名餘匪滾

崖竄逸隨卽將強虎哨山梁奪據當有勞神寨地母村苗
日吳老巖吳老季等詣營乞命僉稱官兵日夜攻打逼近
平隴看來平隴斷不能守住是以相約來投如果能保全
身命情願告知附近苗寨趕緊設法縛獻石柳鄧等以圖
贖罪

二十六日

和琳奏言臣於十二三等日同額爾登保德楞泰興肇阿
哈保西津泰花連布達音泰及巴圖魯侍衛將領等由強
虎哨分兵進發連克後坡新寨麻里灣等處大小賊卡十
餘處斃賊甚多

是月總督伯和琳卒於軍公仍偕額爾登保及姜晟督兵前進

九月十一日

公偕額爾登保奏言臣等於和琳病故之後卽嚴飭領兵

各大臣侍衛官員等均同心合意照常安靜防守以期剿淨賊匪斷不致稍涉張皇伏念臣等均由行伍疊蒙

聖恩用至領兵要職於攻卡剿賊尙力所能爲若總統軍營一切實難勝任懇請

皇上派出大臣前來湖南軍營總統辦事

諭曰據姜晟額爾登保等奏和琳因受瘴疫以致洩痢病逝覽奏

深爲震悼此時勦捕苗匪正在喫緊之際不可無人督率且聞額爾登保亦因該處水土惡劣染患痢疫已覺勉強支持該處現止有德楞泰一人湖北鍾祥竄逸餘匪易於搜捕有永保恆瑞慶成舒亮富成等儘能辦理明亮鄂輝接奉此旨著卽就近由驛加緊馳赴湖南接辦統理軍務劉君輔現在花園隆團一帶防堵但伊已年老所有湖廣提督員缺已降旨將鄂輝補授湖廣官兵皆其所轄呼應更靈易於集事劉君輔仍當在花園一帶實力防堵俟事竣後另候簡用至勒保前因雲南黑獐滋擾令其馳回雲南查辦但昨據江蘭奏已將該獐匪圍住卽日瘴退可以帶兵進捕又有珠隆阿蘇爾相永甯在彼不乏大員

督率且此等化外野夷卽畏懼藏匿不妨緩捕可暫置之度外勒保接奉此旨亦著卽加緊星馳回至楚南同明亮鄂輝籌辦一切現在湖南軍營無人總統額爾登保又經患病德楞泰與姜晟若能帶兵攻克平隴生擒石柳鄧吳廷義等解京正法此則伊等之功倘因患疫人衆兵老力疲而和琳甫經病逝軍心一時未能鎮定則德楞泰姜晟在彼惟當於要隘處所加意防範勿使苗匪竄逸俟勒保明亮鄂輝等到齊後再行會商進剿未遲額爾登保與阿哈保綸布春現俱患病自不便再駐該處著卽先移往辰州以資調攝姜晟現在軍營幫同辦理稍慰朕懷著卽賞給總督銜以資彈壓姜晟年過六旬亦不宜久駐該

處致有傳染或在辰州往來查察與德楞泰花連布等熟商妥辦以副委任其兵丁人等儻有染患疫疾須行抽換之處並著先行酌辦抽換以息兵力俟勒保明亮鄂輝到後再行會商進剿亦無不可

十九日

公偕額爾登保姜晟奏言大兵剿捕苗匪自克復乾州以後其緊要巢穴雖止平隴一隅而此外三廳所屬未降未剿寨落爲數正多肅清較形費手蓋緣苗疆旣極叢歧苗性又多反側剿旣不能盡殲其黨撫亦難以固結其心是以前次和琳籌議善後章程曾將大局稍定後必須分投

搜剿及留兵彈壓情形奏蒙

聖鑒乃自前月下旬以來攻剿正當喫緊之際和琳一經染病猝致不起實出人意料之外兼之本年酷暑薰蒸自交秋令所有將領兵丁內沾染疫痢者更覺日久日多臣等日擊情形若僅顧攻剿平隴不將前後各路設法布置鎮定人心則關係實非淺鮮是以連日以來臣額爾登保德楞泰周歷各營卡嚴飭各帶兵將備務使軍威整肅不許稍露驚惶凡有陸續來投零星苗寨俱詳晰開導准其降順密察各路降苗守卡防禦均能照常出力惟吳隴登一犯近日因伊子吳老觀患病身死益覺自顧不遑亦不致有他

慮正在分投查辦間適鎮筵鎮臣富志那自湖北起身於

初四日趕至軍營該鎮老成細緻鎮筵是其本任臣等卽

令會同永綏協魁保及三廳文武嚴密稽查務將各路降

苗駕馭妥協毋使稍有掣肘其永綏所屬之隆團花園一

帶距大營較遠前經和琳欲令駐劄該處之鎮臣袁國璜

回赴重慶本任是以將提臣劉君輔調赴鎮筵以鎮臣蘇

靈調至隆團原因就各路情形調劑得宜起見今查重慶

所屬毗連楚北處所教匪漸就甯貼則袁國璜正應暫綏

回任以便與蘇靈分駐隆團一帶並據袁國璜於隆團地

方拏獲賊目隴長受一名訊係上年秀山所獲賊目隴長

固之兄亦屬緊要重犯解營審訊後卽行寸磔梟示至平隴賊匪因官兵相逼甚近無不悉力相持冀圖固守現在一面將前後各路官兵布置嚴密一面駕馭降苗於鎮溪所寨陽等處安設苗卡遏其逃竄一俟分撥定局霧雨晴霽卽當整頓兵力設法進攻至臣姜晟自抵大營所有一切應辦事件悉與額爾登保等面加商榷並將善後章程內安插民苗各事照常認真料理而軍火糧餉各項供支尤屬緊要現仍飭令河溪瀘溪辰州一帶上緊轉輸並知會黔撫臣馮光熊分投接濟務期支應裕如不使絲毫短絀再臣額爾登保係因水土不服患痢月餘趕緊調治漸

就平復現仍照常帶兵辦事

公偕額爾登保姜晟又奏言湖南自剿辦苗匪以來其未經抗拒官兵真心投順者固多而其中先經糾結抗拒及見官兵攻剿緊急自知無路求生始行乞命並願縛獻賊首希圖免罪邀賞者不一而足此種先叛後降自與本來安分良苗原有區別惟緣人數衆多不得不隨時駕馭俾收以苗攻苗之用而其心究屬叵測誠如

聖諭若令仍居原處不另妥爲安置難保日久不復滋事端將來剿捕事竣除實在曾經打杖守卡或邀集衆苗擒獻賊目准其立功自贖外如始終觀望首鼠兩端之徒雖名爲投

順將來自應酌量移徙以杜萌蘖復生至平隴爲匪徒聚集之所四面皆山距乾州不遠如駐以重兵自能得力因念前定善後章程內駐兵築堡地方原係核其大局形勢而定此外如有捍衛城池聯絡道路應官兵防守彈壓者統俟攻克平隴之後歸入善後案內熟籌妥辦俾資經久諭曰連日盼望湖南軍報正深繫念本日報到朕卽加披閱摺內首列額爾登保之名喜出望外額爾登保久歷戎行領兵打仗實爲出力前因其染瘴泄痢廛念不置茲得伊平復之信實深欣慰軍營自和琳病逝後一時總統乏人將士等未免失所倚恃茲額爾登保德楞泰姜晟能處以鎮靜整頓軍威並不稍露

惶遽尙屬可嘉額爾登保著賞給金盒一件白玉四喜大吉佩
一件大荷包一對小荷包四箇德楞泰姜晟並著各賞黃辦大
荷包一對小荷包各四箇至臬司楊揆一手協理軍務條理秩
如亦屬可嘉著賞給花大荷包一對小荷包四箇以示獎勵據
奏現將前後各路官兵布置嚴密並駕馭降苗安設卡座卽設
法進攻不敢稍失機宜等語所辦俱好計此旨到時該處霧雨
早經晴霽氣候已正明亮鄂輝亦可到彼若能於明亮等未到
之先攻克平隴或駕馭勞神寨降苗吳老巖等令其擒獻石柳
鄧吳廷義等此卽額爾登保等之功朕必格外優獎尙平隴前
後各路布置略需時日則明亮鄂輝一到額爾登保等當與之

會同熟商妥辦迅速歲功以副委任

二十八日

公偕額爾登保姜晟奏言

臣

等於本月初十日以後天氣

漸晴各路大小苗寨畏懼聲威陸續投順者爲數甚眾均
暫用好言安撫並詳詢情形知各苗寨內疫癘盛行各苗
匪等無不心存悔懼除如平隴等處始終怙惡之外其餘
情願投順各苗尙不至乘機勾結復萌反側自應整頓兵
力趕緊直剿賊巢以定大局惟緣各官兵等疫病日久必
須設法分撥是以臣額爾登保德楞泰等先將患病較重
之兵分別遣回各營俾免傳染其患病稍輕者酌量於正

大松桃辰州等處令其認真調養用示體卹並查各兵帳
房因雨溼薰蒸致多霉爛臣姜晟復飛飭局員趕緊添製
給令更換不但使官兵稍避霧雨相侵而營卡軍容亦資
整肅臣等通盤查辦之次卽順便將壯健可用之兵於後
路各卡酌量抽撥移赴前敵於平隴南北兩面臨口扼要
拏營十六七等日賊苗早晚均於山溝路蟻聚而來臣等
整兵力擊隨時潰竄仍令各將領等暫緩窮追一俟布置
定局以爲一鼓殲擒之計至永綏一路自提臣穆克登阿
駐劄該處防範極嚴嗣復添派

奏請來營之原任江西糧道陳蘭森前往料理安插等事該

道到彼後會同穆克登阿招集鄉勇二千餘名卽給與所
收降苗器械令隨官兵打仗各鄉勇等極爲踴躍本月十
三四等日提_臣穆克登阿及該道帶領兵勇攻剿附近之
補林等寨該苗匪等聞信亦糾集苗匪前來抗敵我兵爭
先奮勇槍礮並發斃賊極多並經降苗隴長哥將手執紅
旗賊目隴章三用槍打斃降苗隴老田復將爲首賊苗石
老賽戮傷拏獲解赴大營訊明正法現在知會該提_臣一
俟此間進取平隴永綏一路卽查明各逆苗寨落相機攻
剿以期得力

十月初四日

公偕額爾登保奏言查平隴賊巢山勢險峻官兵節次奪據要隘併力環攻而賊苗節節砌築木城石卡並於平田處所刨溝放水以阻路徑極爲可惡臣等連日將各官兵抽撥齊全察看形勢惟從東南兩山中間可以奪險而進而兩旁賊卡負隅聯絡不下六七里之遙必須分路鼓勇痛加攻剿並查平隴迤西山後一帶本有間道可通擒頭坡金嶺沖廓家寨等處臣等先派都司徐洪相帶領隴登歐老觀龍老友等及該處各寨降苗分投堵截毋許繞出我兵後路至寨陽三岔坪等處降苗歷次真心出力臣等復檄令該百戶楊鼎心楊鼎貴吳廷試麻季保等隨

同官兵聽候調派以壯聲勢分撥既定卽於二十一日先
派總兵達音泰帶領豐紳阿達楊遇春等帶漢屯弁兵由
勞神寨南面山溝繞至蒼茅坳設伏迎敵總兵朱射斗帶
領多隆武富蘭德甯等直撲杜神堂總兵托爾歡帶領阜
保等直撲強虎寨副都統西津泰帶領墨爾歡保等直撲
乾溪臣德楞泰帶領總兵富志那色克通阿等總統各路
官兵在前督率臣額爾登保帶領三音庫巴彥諾木齊等
往來督催臣姜晟同興肇帶領安慶那全等隨後繼進副
都統阿哈保帶領溫春三布鼎等帶騎馬滿漢弁兵預備
賊匪奔竄四路追截二十一日初更之次各路官兵俱向

派定地方分路進發賊匪探知官兵層層圍裹而進亦卽
糾眾四出分投抗拒達音泰一路官兵在前遇賊匪立督
弁兵鼓勇接仗槍礮競發臣德楞泰一聞槍聲星飛帶兵
直由都魯溪大山搶至黃土坡地方與達音泰合兵夾擊
圍住賊匪二百餘名殲戮殆盡連克黃土坡蒼茅坳大小
木城石卡六處次日天甫黎明西津泰朱射斗托爾歡等
三路官兵與賊匪力戰短兵相接攪殺一處臣德楞泰帶
同達音泰於奪獲黃土坡賊卡後復帶兵向前分投策應
臣額爾登保占住興隆坪山梁亦復分兵下壓賊匪一時
四面受敵無不捨命撿鋒左右山梁賊卡內槍矛如雨達

音泰右手小指帶傷衣襟上連著四槍幸俱未透各官兵
爭先踴躍愈勦愈力已刻以後賊匪漸行退怯臣德楞泰

督率三路官兵連將杜神堂乾溪強虎寨三處木城石卡

全行攻克並將旁路磨子園等處賊卡乘勝占據臣額爾

登保德楞泰及臣姜晟興肇合兵一處直從牛心地象心

地至山家坳將平隴賊巢正面山口截住安設大礮併力

轟擊共計各路官兵斃賊三百餘名拏獲帶傷活賊二十

七名卽於軍前正法梟示現在官兵駐劄處所距平隴巢

穴僅四五里惟緣寨落之前有橫河一道賊匪糾眾正在

沿河守禦其左首有橫嶺一道險峻異常各路勦散之賊

復竄聚橫嶺之上我兵如轉過山坡竟攻賊寨苗匪於山巔排列槍礮甚多處處可及是以臣等現在商酌俟稍息兵力將此間橫嶺一道設法奪據即可乘勝下壓惟有鼓勵將士相度機宜趕緊進取仍通傳後路降苗儻該首逆等情急逃竄務須擒獻以邀

恩賞並乘賊情畏懼之際將計就計播散風聲如果吳廷義等能將石柳鄧縛獻亦准免其一死此刻臣等一面設法辦理一面整頓兵力隨後進攻

諭曰軍營自和琳病逝之後一時總統乏人額爾登保等處以鎮靜復能分路進兵攻奪緊要賊卡現距平隴巢穴僅四五里藏

功在即所辦甚屬可嘉朕心深爲喜慰額爾登保德楞泰姜晟
著加賞繡蟒袍料各一件興肇阿哈保西津泰達音泰朱射斗
托爾歡富志那亦著賞織錦蟒袍料各一件其餘出力將弁著
查明咨部議敘

十一日

公偕額爾登保姜晟奏言_臣等前次進兵直至山家坳一
帶距平隴巢穴僅四五里惟緣寨落之前有橫河阻隔左
首復有橫嶺一道險峻異常賊苗距山傍河抵禦甚力當
經_臣等安設大礮並力轟擊其左首橫嶺地名巖人坡必
須設法奪據方得勝勢隨於二十五日派令阿哈保達音

泰帶領三音庫阿林布等帶兵一路由山家坳進攻西津
泰朱射斗帶領多隆武達桑阿等帶兵一路由象心地進
攻臣額爾登保德楞泰督率托爾歡格布慎豐紳色克通
阿等帶領奮勇備弁兵丁由磨子園繞道抄出巖人坡之
後臣姜晟興肇綸布春帶領三布爾八十四巴克坦布等
往來策應繼進所有阿哈保達音泰西津泰朱射斗等兩
路官兵於黎明直撲巖人坡山梁山上賊匪持械抵拒往
來衝突勢甚兇悍我兵鼓勇競進槍箭所到斃賊極多維
時臣額爾登保等由磨子園一路帶兵趕到三面合攻賊
匪驚惶無措紛紛潰散臣等一面分兵下壓一面趕緊擊

卡乃適值霧氣四合大雨淋漓後路強虎哨地方橋座已爲山水冲塌平隴賊巢前面橫河及平田之內處處水發勢難竟進祇得暫住至二十八日晚間天氣漸晴復於次日分兵前進連克查口洞平頭梁下溪溝羅家灣等處大小山包聯絡擎卡三十餘座每卡駐兵二百餘名至數十名不等緊逼平隴賊匪到處出沒迎敵被官兵剿散三十日早辰據報賊匪復屯聚大壩角地方查大壩角卽係平隴分出苗寨正扼進兵要路臣等一經得信出其不意立即進攻當將大壩角苗寨三十餘戶全行燒燬斃賊二百餘名其餘奔竄滾巖落水者不計其數惟查平隴吳八月

苗寨西南爲莽車西北爲孟水冲俱在隔河築砌石城左右挖有深溝兩道寨後有小路數道沿緣直上通往後山大壩角在平隴之南自上而下坡礮陡險坡下多係水田此時苗匪或在後山搭棚藏匿或在寨前溝礮之內埋伏相去道路雖近但官兵下撲賊巢凡前後及兩傍溝內賊苗均可乘間抄截未便稍涉冒昧現今降苗訪探賊情據稱吳廷義等畏懼兵威情願縛獻石柳鄧以圖贖罪只求暫免燒燬寨落宥其一死似覺機有可乘而察看寨落前後屯聚賊匪守禦又仍嚴密如此狡詐伎倆所有情願縛獻首逆之說旣未可信若攻勦過於急切復致首逆竄入

他處或我兵前後稍有不能照應亦非萬全之道臣等再
三籌畫惟有一面暫行允准令縛獻首逆前來予以生路
且俾首逆不致遠颺一面密爲布置駕馭降苗整頓兵力
步步拏卡而進相機剿洗一鼓集事

諭曰額爾登保等督率將弁分路進攻連奪巖人坡大壩角等處
卡寨所辦尙好額爾登保德楞泰姜晟著賞給黃辦大荷包一
對小荷包各四箇其分路帶兵之阿哈保達音泰西津泰朱射
斗著賞給花大荷包各一對小荷包各四箇以示獎勵

十七日

公偕額爾登保姜晟奏言平隴苗匪自經官兵節次攻剿

之後創溝築卡嚴護賊巢或於寨前埋伏或於山後屯聚並聲言縛獻石柳鄧以圖贖罪體察賊苗狡詐伎倆緩兵誘敵兩者兼之是以_臣等整頓兵力逐步進攻前將大壩角苗寨攻克後該苗匪等因官兵愈逼愈近無不併力相持初三四等日_臣等督同綸布春阿哈保達音泰朱射斗等由大壩角迤西山坡之下接連拏卡而進賊苗一經知覺卽於溝壩內排列放槍_臣等嚴督官兵均用槍礮對面相抵營卡甫立賊苗復於初四日徹夜往來攻撲直至黎明經官兵槍斃無數始行暫退_臣等惟恐該苗匪負固守隅被剿緊急復圖他竄預飭各路降苗分投探聽適據降

苗吳隴登歐老觀麻老季吳廷試等報稱探訪平隴賊匪
現在分股欲從馬鞍山捧風坳一路撲出邀約上下麻冲
火麻營久蘇坪等處未降寨落以爲救援臣等得信立飭
西津秦托爾歡等將馬鞍山捧風坳一帶大小路口嚴密
隄防分兵堵禦乃該苗匪等一面與大兵對拒一面潛由
馬鞍山地方奪路思竄節次糾夥而出連被官兵截回仍
於平隴後山屯聚抗拒正在籌剿之次適明亮鄂輝於初
五日馳抵軍營臣額爾登保德楞泰姜晟復察看情形公
同商酌惟緣平隴巢穴地處四山之中附近苗寨互相聯
絡我兵止能遏其兩面山後一帶峭壁懸崖聚則負隅難

攻散則連逃可慮急須另籌剿捕以期計出萬全迅擒逆首

諭曰前因額爾登保等奏吳廷義聲言縛獻石柳鄧以圖贖罪當經降旨以苗匪等不過藉此爲緩兵之計不可聽信仍當上緊進攻今據奏體察苗情實係冀圖官兵緩於進攻果不出朕所料苗匪於大兵逼緊攻圍之際尙思潛由馬鞍山一帶奪路逃竄經官兵截其去路仍於平隴後山屯聚抗拒可惡已極自應設法進剿以爲擒渠之計現在明亮鄂輝已到軍營雖久歷戎行但甫抵該處於苗疆形勢尙未周知而額爾登保德楞泰在彼年餘較爲熟諳明亮鄂輝雖經朕派令前往接辦但不

能如前此福康安和琳之總統軍務軍營帶兵各大員俱受其
管轄者可比而額爾登保德楞泰在彼熟悉情形亦必不肯因
明亮等到彼稍存推諉伊等能和衷辦事甚屬可嘉明亮額爾
登保德楞泰鄂輝姜晟著賞喜字白玉搬指各一箇黃瓣大荷
包各一對小荷包各四箇以示獎勵伊等益當同心協力通盤
籌畫迅速進擣平隴擒獲首逆固不可冒昧深入亦不便日久
相持前據畢沅奏請撤回苗寨官兵朕卽以平隴未得石柳鄧
未獲所言尙非其時屢經降旨宣諭現在明亮鄂輝已抵軍營
正當共持定見一意進取平隴旣克賊首就獲其餘未降苗寨
自必聞風震懾相率乞降卽有一二苗寨畏罪不敢投出者惟

時勦撫兼施亦屬易辦方可照畢沅所奏徐議撤兵而此時斷無不辦之理伊等皆係久厯戎行經朕委任不可不倍加奮勇迅速蒞功至摺內稱採訪平隴苗匪現欲從馬鞍山捧風坳一路撲出邀約上下麻沖等處未降苗寨以爲救援等語石柳鄧等如糾眾死守該處山高路窄進攻未免費力今據稱欲離巢他徙勾結何不將計就計故寬一面任其竄往他寨或於途次邀截擒拏或爲設法離間未降各寨並鼓勵降苗石柳鄧等逃至該寨立時擒獻豈不更爲省事此係朕偶想及此能否如此辦理並著明亮等酌量妥辦以期首逆速擒再辰溪一帶爲糧餉轉運總路亦不可無大員督率儼催湖南軍營現有明亮額

爾登保德楞泰鄂輝四人足資料理姜晟應仍回辰州一帶照料更昭嚴密

同日公偕明亮額爾登保鄂輝姜晟又奏言臣等於十月

初四日接准英善咨稱達州所屬亭子鋪有教匪屯聚帶兵馳往剿辦查達州界連川楚該匪徒等竟於州城附近聚眾滋事必須趕緊剿捕但川兵半赴黔楚卽提鎮將領等亦均帶兵在營英善馳往該處止帶省標兵五百誠恐不敷調派而此間將備兵丁隨臣等打仗及防守卡隘正關緊要又難抽撥惟有駐劄隆團川兵鄉勇一千餘名係袁國璜帶領駐守近日該處苗情尙屬甯靜臣等再四酌

商當飛飭袁國璜卽就川省兵勇內或全數撤回或抽撥五六百名帶赴達州以資協剿其隆團地方卽札飭總兵蘇靈張廷彥將袁國璜所駐營卡通融撥兵慎密防守自可無虞疎懈

十一月初一日

公偕明亮額爾登保鄂輝姜晟奏言查平隴一隅負固日久官兵節次拏卡前進止能遏其西南西北兩面而周圍山坡層疊附近苗寨互相聯絡賊匪抗拒甚堅其後山一帶峭壁懸崖本有賊匪占據必須於東南一面打狗坡山梁酌量添兵以分賊勢方可設法進剿臣等公同籌酌惟

有再於後路各營卡內通融抽撥以壯聲援

臣

明亮額爾

登保鄂輝於初十日起身馳赴後路直抵新寨黃毛坡等處於防守各兵內撤出二千餘名並通傳各寨降苗諭以卽日攻克平隴倘首逆石柳鄧等情急竄逃務當併力擒獻以邀獎賞各降苗等均各歡欣踴躍沿途續行投順者不下二千餘戶

臣

明亮等一面於後路設法辦理

臣

德楞

泰一面督率鎮將由大壩角迤西接連拏卡直通打狗坡山梁一俟後路撥兵到齊卽爲環攻合剿之計十二三等日平隴各寨苗匪因見官兵層層圍裹而進無不悉力相持經我兵槍礮轟擊並不稍退十四日辰刻該苗匪等乘

我兵擊卡甫定復糾集夥黨直前攻撲適

臣

額爾登保由

茨巖一路先行帶兵趕到卽督率各卡槍礮並發痛加截

殺賊匪始暫退回而兩旁并車孟水冲等處苗匪刨濠築

卡防守愈嚴其平隴大寨之前及後山一帶屯聚藏匿者

更不可勝計十五日晚間

臣

明亮鄂輝帶領後路所撤各

兵陸續到齊當卽分派巴圖魯侍衛將備等將東南一面

打狗坡山梁連夜占住十七日丑刻鼓勵將士分兵四路

臣

額爾登保帶領綸布春達音泰三音庫等由獅子坡前

進坡下橫有溪河一道河礮均被賊匪挖下數尺幸水勢

已退不致過深有千堡土守備行營叅將阿拉首先帶領

屯兵灑水競過

臣

明亮帶領西津泰朱射斗溫春多隆武

等由觀音坡前進爲左兩路

臣

德楞泰帶領阿哈保薩克

丹布色克通阿等由右路巖人坡下溝前進

臣

鄂輝帶領

託爾歡安慶墨爾歡保等由甲式溝前進爲右兩路

臣興

肇帶領富蘭阿納保富魁等排列大礮由石老巖一帶山

梁併力轟擊

臣

姜晟隨後接應各路官兵先後進發所有

平隴寨前正路賊匪處處創斷溝礮並於寨落周圍築立

石牆密豎木柵賊衆藏匿其內捨死抗拒我兵奮勇競進

預用口袋盛土遇有溝礮卽填濠跳越而進前至石牆木

柵一面放槍一面用火彈火箭拋入斃賊甚多遂將寨前

一帶石牆木柵全行攻得餘賊驚惶逃竄官兵乘勢直入吳八月寨內縱火焚燒時已至午我兵正在搜擒首逆之際復有莽車孟水沖等處附從賊匪一二千人見平隴正寨已失均各捨命前來攔鋒救應並有平隴東北大山梁之貴魚坡一帶深林密箐內突出千餘人由平隴寨右蜂擁而至臣等卽令阿哈保達音泰帶兵迎擊莽車孟水沖左右救應之賊綸布春三音庫卽帶兵剿殺貴魚坡衝下之賊興肇帶兵由老石巖下山分投衝擊至申初賊匪不能抵禦紛紛逃竄俱向東北大山扳援石壁而上藏匿林箐排列放槍奔走趨捷我兵乘勝追擊直搶貴魚坡惟緣

山勢陡險樹木叢深兼之大雨如注密霧四起我兵未便窮追隨將官兵撤至楓形地一帶暫行駐劄除官兵連日臨陣殺賊不計外所有攻克平隴四路官兵共計割獲首級四十五顆搶獲槍刀器械甚多查平隴地方四圍山勢環列苗寨櫛比無算賊苗抗拒逾時茲幸仰仗

天威掃翠巢穴雖首逆石柳鄧等未及就擒而

臣

等詢問降苗據

稱貴魚坡孟水冲莽車等寨俱與平隴親戚計算該首逆等勦散之後自必在東北一帶險山苗寨藏匿

臣

等察看情形如此刻薄險窮追限於地勢必至併力相持惟有先將附近勦散各苗相機招撫多方布置冀將該首逆設法

生致完善厥功庶幾上慰

聖慈廑注

諭曰平隴賊匪負固日久經明亮等督率鎮將弁兵分路進剿奪獲險隘直搗平隴賊巢燒燬賊寨所辦甚屬可嘉除姜晟已加賞總督銜外現又另降諭旨將額爾登保補放領侍衛內大臣德楞泰署理領侍衛內大臣仍賞明亮額爾登保德楞泰鄂輝姜晟珊瑚豆黃瓣大荷包各一對小荷包各四箇其分路帶兵之興肇穆克登阿綸布春西津泰阿哈保達音泰朱射斗託爾歡均著各賞大荷包一對小荷包四箇以示獎勵

又

諭曰額爾登保德楞泰勦辦湖南逆苗節經攻戰甚屬奮勇近因和琳病逝深慮軍中總統乏人官兵不免心存觀望乃額爾登保等能處以鎮靜董率有方今復協同整兵攻克平隴直搗賊匪巢穴實屬可嘉現在阿桂年老其所管鑲黃旗領侍衛內大臣卽著額爾登保補授額爾登保未回京之前仍著阿桂署理至額爾登保所署正黃旗領侍衛內大臣著德楞泰署理仍令在御前侍衛上行走以示鼓勵

恭錄

御製詩

署將軍明亮等奏官兵攻克平隴賊巢詩以誌慰

蓋臣繼逝心如失

上年二月間黔楚逆苗滋事福康安和琳二

兵後由黔入楚屢次克獲險要殺賊無算不意今年五月內福康安積勞受瘴病故聞之已深悼惜幸尙有和琳在營接辦將士等咸遵約束用命以爲卽可成功乃八月內和琳忽又染患時疫不起二臣殫心忠盡相繼溘逝不但深堪軫悼實於軍營大局關係非淺朕心兩將調停意少蘇
自福康安和琳相繼病爲之懸廬日夜不置
逝後深慮軍中總統乏人官兵等或致心存觀望而額爾登保德楞泰竟能接手辦理督率鎮靜調度有方其時姜晟適在大營卽命同二人共相彈壓衆兵不特卡隘防守嚴密並設法攻
逆命大員商進剿
軍營勦屢獲勝仗奏到後始爲少釋縶念
一切事務亟須大員督同辦理其時明亮適將湖北孝感鄂教賊匪勦淨因思所有鍾祥屯聚匪徒永保恆瑞慶成舒亮諸人足資帶兵進剿不難掃除盡淨因降旨令明亮鄂輝二人星卽馳赴軍營與額爾登保德楞泰姜晟會商進剿事宜速圖蕪績可

嘉同志竭佳謨

明亮鄂輝馳抵軍營後並不以總統軍務自居

等二人前來少存袖手旁觀之念深知以國事爲重和衷共濟協力同心熟籌進剿之策前次奏摺列名次序已可概見卽此

深堪嘉賞知其必乾州已獲仍前烈險峻山梁直抵乾州擒獲
能相與以有成也首逆石三保後卽進兵攻得三岔坪捧風劫強虎哨諸卡隘相
距平隴僅止十餘里賊勢窮蹙萬分不過抵死支撐苟延殘喘
而已平隴茲收續後誅一路拏卡而進茲據奏平隴周圍山坡層
疊苗寨互相聯絡抗拒甚堅必須設法進攻以分賊勢因於後
路抽撥兵二千明亮額爾登保鄂輝帶兵由後路繞進德楞泰
帶兵由打狗坡前進爲環攻合剿之計自初十日至十三日悉
力相持十四日額爾登保由茨巖先到官兵槍礮轟擊痛殺賊
苗始暫退回其平隴大寨前後山屯聚藏匿之賊不可勝計十
五日明亮鄂輝帶兵到齊遂連夜占據山梁分撥調度十七日
分兵四路額爾登保等由獅子坡而進明亮等由觀音坡而進
德楞泰等由巖人坡下溝而進鄂輝等由甲式溝而進與肇等
排列大礮由老石巖一帶山梁轟擊姜晟隨後接應所有平隴
寨前正路處處創斷周圍築立石牆密樹木柵賊人藏匿捨死
抵拒我兵奮勇百倍填濠越進將石牆木柵全行攻得賊人驚
竄官兵乘勝直入寨內焚燒其前來救應之莽車孟水沖貴漁
坡等處逆苗俱爲兵殺散扳援石壁而上奔走趨捷官兵正在
追擊因山險箐密大雨如注濃霧四起未便深入因撤兵至楓

形地方駐劄連日殺賊不可勝計賊巢全已掃蕩無餘矣平隴賊衆負固日久此番全行燬滅明亮等諸人深堪嘉獎除分別賞賚外念額爾登保德楞泰二人尤爲可嘉將額爾登保賁授爲領侍衛內大臣德楞泰亦令署理領侍衛內大臣其在事出力將弁等亦分別速待生擒致二豎平隴賊巢既破苗匪失所憑依倍加震懾惟有逆首加恩以示獎勵

石柳鄧及吳八月之子吳廷義二人雖逃竄未獲據明亮等詢之降苗僉稱該逆匪勦散之後在東北一帶險山苗寨藏匿不過暫時偷活斷不能他竄因諭明亮等益當鼓勵將士乘勝追捕設法生致或曉諭降苗縛獻將附近勦散各苗相機招撫妥爲布置完善蕲功自當加恩懋賞此時大功已成十分之九速望擒渠捷奏則予十全武功之外又贏一績惟敬待

鴻佑喜音
十全功外一功符

過至耳

吳蒼